



S E R M O N  
T R O I S I E S M E  
S V R L' E P I S T R E A V X  
H E B R E V X , C H A P . I . V E R S . 3 .

*Lequel [ Fils ] estant la resp'endeur de  
la gloire, & la marque engravee de  
la personne d'iceluy, &c.*



Iesus-Christ nostre Seigneu  
en saint Iean chapitre 17.  
parlant à Dieu son Pere dit,  
*cette est la vie eternelle de se  
cognoistre seul vray Dieu, &  
celuy que tu as envoye Iesus-Christ*: Esquel-  
les paroles Iesus-Christ disant en termes  
de present que *cette est la vie eternelle*, nous  
apprend que la vie eternelle & la gloire que  
nous attendons au Ciel s'encommence des  
icy bas par l'Euangile; aussi voyez-vous es

E iij

Escritures du nouveau Testament que l'Evangile & ce que Dieu nous y donne de sa cognoissance est appellé le Royaume des Cieux : En ce sens sainct Iean Baptiste disoit que le Royaume des Cieux estoit prochain, & Iesus-Christ disoit que le Royaume des Cieux estoit forcé, & que les violens le rauissoient, ayant esgard aux desirs ardens que la predicatio de Iean Baptiste auoit donné de la manifestation du Christ & de la gloire de Dieu en iceluy. Et c'estoit pour cette manifestation que iadis les Prophetes disoient à Ierusalem, (comme vous le lisez au 60. chap. d'Esaië,) *Leue toy sois illuminée, car ta lumiere est venue & la gloire de l'Eternel est leuée sur toy, car voicy les tenebres couuriront la terre, & obscurité couurira les peuples; mais l'Eternel se teuera sur toy & sa gloire apparostrera sur toy.*

C'est par cette gloire que l'Apostre en l'Epistre aux Hebreux recommande la reuelation faite au nouveau Testament, & la prefere à celle qui auoit esté faite iadis à diuerses fois & en diuerses manieres aux Peres par les Prophetes : c'est aussi par cela qu'il exalte Iesus-Christ par lequel Dieu a voulu se communiquer à nous, par dessus Moyse & les Prophetes, puis que Iesus-Christ nous

manifeste ce que Moyse & les Prophètes auoient tenu couuert. Et par cela il fait voir quelle reuerence, foy & obeysfance est requise enuers Iesus-Christ & son Euangile, & de quelle ioye Iesus-Christ & son Euangile doiuent remplir nos cœurs, puis que la lumiere qui y resplendit dissipe les tenebres de nos miseres & de la mort mesmes, & commence en nous la vie & la gloire du Royaume des Cieux.

Venez donc, fideles, contempler Iesus-Christ la resplendeur de la gloire du Pere: disposez-vous dès maintenant à la veüe de Dieu afin que vous en foyez participans au siecle à venir: Voyez-le dès à present par l'Euangile; afin de le contempler vn iour en son Paradis: icy vous est permise la curiosité qu'eut iadis Moyse de voir Dieu, voire d'autant plus que Dieu veut contenter cette sainte curiosité plus amplement qu'il ne fit celle de Moyse: Moyse demanda de voir Dieu; & il ne luy fut oütoyé de voir que la semblance d'vn homme par derriere, mais en l'Euangile il vous est oütoyé de voir la face de Dieu, car la ley n'ayant que les ombres des biens à venir ne monstroit point la gloire de laquelle Dieu donne cognoissance en la face de Iesus-Christ par l'Euangile.

Et c'est ce que nous verrons en l'examen des paroles que nous vous auons leuës, à sçavoir que Iesus-Christ est la resplendeur de la gloire du Pere & la marque engrauée de la personne d'iceluy.

L'Apostre a commencé son Epistre par ces mots, *Dieu ayant iadis par plusieurs fois & en plusieurs manieres parlé aux Peres par les Prophetes, a parlé à nous en ces derniers iours par son Fils, lequel il a constitué heritier de toutes choses, par lequel aussi il a fait les siecles; & maintenant il ad-jouste, Lequel Filz estant la resplendeur de la gloire du Pere & la marque engrauée de la personne d'iceluy, soustenant toutes choses par sa parole puissante, ayant fait par soy-mesme la purgation de nos pechez, s'est assis à la dextre de la Majesté es lieux tres. hauts.* Paroles tres-conuenables au but de l'Apo- tre, car par qui estoit-il conuenable que Dieu en ces derniers iours nous illuminast de sa cognoissance, & communiquast les rayons de sa gloire & la lumiere de vie, qu'en nous parlant par celuy qui est la resplendeur de sa gloire & la marque engrauée de sa personne par celuy, dis-je, qui a esté esleué sur le thron- ne celeste; & auquel le Pere a transmis la gloire de son regne pour estre l'image & la

resplendeur du Pere en son empire, comme il l'estoit desia par sa generation eternelle. Par ces paroles doncques l'Apostre monstre que Iesus-Christ est infiniment au dessus de tous les Prophetes par lesquels Dieu se communiquoit aux hommes en l'ancien Testament, & que nous deuons à Iesus-Christ vne souueraine reuerence & obeysance de foy, puis que c'est celuy qui estant l'image naturelle de Dieu a aussi receul image & la gloire du regne que Dieu a sur l'vniuers. Car le but de l'Apostre paroist en ce qu'il ne dit pas, lequel Fils est la resplendeur, mais, lequel Fils, *estant* la resplendeur; comme apres il ne dit pas, lequel soustient toutes choses par sa parole puissante, & a fait la purgation de nos pechez, mais, lequel *soustenant* toutes choses, & *ayant fait* par soy-mesme la purgation de nos pechez s'est assis à la dextre de la Majesté de Dieu: ce qui monstre que ce propos de l'Apostre se rapporte à ce que Iesus-Christ s'est assis à la dextre de Dieu, & conduict les esprits à la consideration de la raison pour laquelle il a esté iuste & conuenable que Iesus-Christ receust cét honneur d'estre assis à la dextre de la Majesté, à sçauoir pource qu'il estoit la resplendeur de la gloire du Pere & la marque engraüée de la person,

ne d'iceluy, & qu'il soustenoit toutes choses par sa parole puissante, & auoit fait la purgation de nos péchez par soy-mesme: & c'est l'ordinaire d'vfer de telle façõ de parler pour exprimer la cause & la raison d'un fait, comme en saint Matth. chap. 1. il y a au Grec touchant Ioseph & la Bien-heureuse Vierge; *Or Ioseph son mary estant iuste & ne la voulant point diffamer, la voulut secrettement delaisser: là où ces mots de l'original, (Ioseph estant iuste) sont traduiçts, pource qu'il estoit iuste: Ainsi donc en cét endroit, où il y a, lequel Fils estant la resplendeur de la gloire du Pere, & ayant fait la purgation s'est assis à la dextre de la Majesté, l'Apostre veut dire que pource que ce Fils estoit la resplendeur de la gloire du Pere, & auoit fait la purgation de nos pechez par soy-mesme, il a esté esleué à la dextre de Dieu. Et nous semble que cette meditation de nostre Apostre a beaucoup de rapport à ce que dit Iesus Christ nostre Seigneur à son Pere en cette excellente priere qui est en saint Iean chap. 17. *Pere, ie t'ay glorifié sur la terre, & maintenant glorifie moy, Pere, enuers toy mesme, de la gloire que i'ay eue pardeuers toy deuant que le monde fust fait: là Iesus-Christ demande la gloire de son exaltation à la dextre du**

**Pere**, & allegue pour raison, premierement qu'il a eu cette gloire là par deuers son Pere deuant que le monde fust fait : or deuant que le monde fust fait, la gloire que Iesus-Christ auoit par deuers son Pere, est qu'il estoit la resplendeur de la gloire du Pere & la marque engrauée de la personne d'iceluy : Secondement, qu'il a glorifié le Pere sur la terre ; qui est en substance ce que dit nostre Apostre, que Iesus-Christ a fait la purgation de nos pechez par soy-mesme, d'autant que l'œuure de la redemption a fait resplendir la gloire du Pere. Ainsi Iesus-Christ estant desia la gloire & resplendeur du Pere par sa generation eternelle, & l'ayant esté encor par son office de Mediateur, l'a esté fait d'abondant par son exaltation. Et c'est à ce tilre que nous nous arresterons en l'heure presente, moyennant l'assistance de Dieu, & y verrons deux poincts.

A sçauoir, premierement : Comment Iesus-Christ est la resplendeur de la gloire du Pere & sa marque engrauée par sa generation eternelle.

Et secondement, Comment il est cela mesme par son office de Mediateur & par l'œuure de nostre redemption ; & restera en la suite du texte, là où sa seance à la dextre

## I. POINCT.

Mais premierement, il nous faut considerer les comparaisons dont l'Apostre se sert: l'une est prise du Soleil, & l'autre d'un cachet qui imprime sa marque, le mot que nous tournons *marque engrauée* estant le mot de *caractere*, qui exprime vne marque imprimée ou engrauée. Comparaisons qui sont de choses fort differentes, mais toutesfois conuiennent tres-bien au subject de l'Apostre; car comme les rayons du Soleil estans vne production du Soleil toute semblable à sa nature, nous font voir qu'elle est la substance & la beauté du Soleil: ainsi la marque que fait vn cachet nous fait voir la forme du cachet & tous ses traits. Et ces deux comparaisons sont employées ailleurs en l'Ecriture, celle du Soleil au 4. de la seconde aux Corinth. où l'Apostre dit que le Dieu de ce siecle a aueuglé les entendemens des incredules, à ce que *la lumiere de l'Euangile de la gloire de Christ qui est l'image*

de Dieu ne leur resplendist, & que Dieu donne illumination de la cognoissance de sa gloire en la face de Iesus-Christ: L'autre comparaison est employée au 6. de saint Iean, où Iesus-Christ dit que le Fils de l'homme est celuy qui dōne la viande permanente à vie eternelle, *car, dit-il, le Pere l'a approuvè de son cachet*, c'est à dire, le Pere a confirmé qu'il estoit le vray Mediateur en luy donnant les marques de sa vertu & gloire diuine, & comme s'imprimant en luy mesme, selon que dit saint Iean au chap. premier de son Euangile, *Nous auons veu sa gloire, voire gloire comme de l'unique issu du Pere*, c'est à dire vne gloire non humaine, mais toute diuine: & à cela tend ce que dit l'Apostre au premier de l'Epistre aux Colossiens, que *Iesus-Christ est l'image de Dieu invisible.*

Je dy donc pour appliquer ces comparaisons de l'Apostre à Iesus-Christ nostre Seigneur, qu'il nous faut considerer Iesus-Christ à deux esgards: à sçauoir eu esgard à sa personne selon qu'elle est de toute eternité engendrée du Pere: & seconiement eu esgard à son Incarnation & office de Mediateur. Quant au premier esgard il a esté difficile de nous mieux représenter ce que

Iesus-Christ est par la generation eternelle, qu'il a eu du Pere, qu'en nous propofant les comparaisons prises des choses qui se presentent à nos yeux: car comme ainsi soit que rien n'entre en nos entendemens que par l'aide de nos sens: Dieu pour nous faire entendre en quelque sorte les choses les plus sublimes & plus diuines, s'est accommodé à nostre infirmité, & nous a representé les choses spirituelles par les sensibles, les choses les plus hautes par celles d'icy bas: & les choses eternelles par des choses créées en temps. Que si on objecte qu'il y a vne si grande distance entre ces choses, que nous apprendrons plutost ce que les diuines & eternelles ne sont point, que ce qu'elles sont. Ie respon qu'encores qu'il y ait vne distance infinie entre ces choses & Dieu, au regard de l'immense perfection de Dieu, il ne laisse pas d'y auoir de l'analogie & semblance. Car tout ce que Dieu a créé il l'a créé en quelque sorte à son image, plus ou moins: De là vient qu'il est dit en la Genese que Dieu vid que tout ce qu'il auoit fait estoit bon; Or toute bonté créée est vne participation de la bonté diuine: & par consequent vne conformité à la diuinité. Et Dieu a créé toutes choses par le Fils qui estoit son image, d'autant qu'il don-

noit à toutes choses quelque petit rayon de l'image qu'auoit son Fils: de sorte que les creatures, soit en leur estre, soit en leurs productions naturelles, plus elles sont excellentes, plus aussi elles ont de l'image de Dieu & de conuenance avec luy, soit quant à son estre, soit quant à ses productions, s'il est permis d'employer ce mot.

Quant à l'estre des creatures: les spirituelles, comme nos ames, sont les plus excellentes: aussi nos ames ont plus de degrez de l'image de Dieu que les creatures corporelles, & certes outre que l'intelligence de l'ame est vn rayon euident de la diuinité, on distingue trois choses en l'ame, son estre, son entendement, & sa volonté: & ces trois choses quoy que distinctes sont neantmoins vne mesme substâce, ce qui est vne petite image du mystere de la Trinité: pour monstrier aux infideles que bien que ce mystere soit infiniment au dessus de la raison & lumiere naturelle, il n'a rien qui ne luy soit bien conuenable: voire mesme que la nature seconde & verifie la reuelation, puis que ce qu'ont les creatures les plus excellentes, elles l'ont comme images de Dieu: & pourtant nous dirons que Dieu a son intelligence qui est le Fils, dont procede son amour comme acte de sa

volonté qui est le saint Esprit; & que ces trois sont vn. Voire en toutes les creatures quelles qu'elles soient, vous trouuerez trois choses, à sçauoir l'estre, la vertu de l'estre, & l'acte qui en prouient; la vertu de la chose est desia comme vne image de l'estre & comme vne petite resplendeur d'iceluy, & l'acte qui en prouient en est vne suite. Or de toutes les choses corporelles, le Soleil estant la plus excellente est par consequent celle dont l'estre a plus d'image de l'estre de Dieu: de là vient que Dieu est si souuent appellé lumiere & comparé au Soleil, & que les Anciens n'ont point trouué de termes plus propres pour exprimer la distinction du Fils d'avec le Pere en vnité de nature, qu'en l'appellant lumiere de lumiere.

Quant aux productions des creatures: ce qui nous conduira à la comparaison de nostre Apostre, est cette maxime certaine, que c'est le propre d'une chose bonne de se communiquer, & s'il faut ainsi dire, de s'espandre: & de fait les creatures ont la vertu de se communiquer & produire leur semblance: les plantes ont leurs semences en elles pour se produire, & les animaux engendrent, c'est à dire produisent leur image: pourquoy cela, & comment cela? à la semblance de la bon-

et diuine, dont elles sont l'image, laquelle d'autant qu'elle est vne bonté souueraine & tres-parfaite, a aussi sa communication, & s'il faut ainsi dire, vne production de son image, mais eternelle & conuenable à son estre. Or le Soleil estant la plus belle & la meilleure des creatures inanimées, a vne maniere de se communiquer tres-admirable, car vous diriez qu'il veut comme se produire & s'espandre, en faisant sortir de soy continuellement ses rayons : tellement que ce qui est la generation és animaux qui ne se fait que par intervalles, & par laquelle ils produisent vne chose de leur nature, cela est cette production de rayons au Soleil, qui sont comme vne continuelle generation que le Soleil fait de soy & de son image. Or remarquez que ces rayons sont de mesme nature que le Soleil ; d'abondant, que ces rayons sont inseparables d'avec le Soleil & sont au mesme temps que luy, encor qu'ils sourdent & procedent de luy, tellement que si le Soleil estoit eternel aussi ses rayons seroient eternels : ainsi donc Dieu qui est vne tres-parfaite mais spirituelle & diuine lumiere, a de toute eternité son Fils comme sa resplendeur & son image procedant de luy ; mais resplendeur de mesme nature que

luy & vne avec luy, ainsi que les rayons du Soleil sont de mesme nature que le Soleil. Et ces choses sont pour refuter les Iuifs & les Turcs, & les Athées de ce tēps, qui disent que Dieu ne peut auoir vn Fils puis qu'il n'engendre point. Cēs brutaux ne regardent pas que toutes choses, voire les plus excellentes, ont quelque maniere de generatiō, mais cōuenable à leur estre, qui est la maniere par laquelle le Soleil mesme, (lequel n'engendre point de la façon qu'ils l'entendent) a vne tres-excellente generation: nostre ame mesme toute spirituelle, a ses generations; car l'ame quand elle se considere, produit par sa conception l'image de soy-mesme, l'ame par cette conception se donnant comme vne resplendeur & reflexion de soy-mesme. Cela estant ainsi, osera-on nous dire que Dieu ne se contemple point soy-mesme? ainſ certes comme son estre est vne infinie perfection, la felicité de Dieu consiste en ce qu'il se contemple soy-mesme: donques cette eternelle contemplation qu'il a de soy-mesme est la generation de son Fils: & entant que se contēplant infinimēt bon & parfait il faut de necessité qu'il s'aime; cēt acte d'amour est le saint Esprit: tellement que comme l'acte d'amour suit l'acte de l'intelligence & en pro-

cede, ainsi nous considerons le saint Esprit procedant du Pere & du Fils: Bref pource que tout ce qui est en Dieu est Dieu mesme; (comme tout ce qui est en la lumiere est lumiere, la perfection ne permettant pas qu'elle ait rien de diuers:) cette image du Pere & cet amour du Pere sont Dieu mesme. Nous sommes contraints, mes freres, de nous estendre ainsi en ces mysteres, & plus auant que nous ne voudrions, à cause de ces profanes dont on fait auourd'huy rencontre fort frequente, qui pour justifier leur atheisme, taschent ordinairement de rendre absurde la doctrine de la Trinite, blasmans ce qu'ils n'entendent point, & que neantmoins la force de la raison & lumiere naturelle peut contraindre de conceder.

Mais, venons maintenant de Iesus-Christ consideré dans le mystere de la Trinite comme la resplendeur de la gloire du Pere, à Iesus-Christ consideré en son office de Mediateur, comme y estant aussi la resplendeur de la gloire de Dieu. Descendons de la generation eternelle de Iesus Christ à l'œuvre de la redemption. Cette descente & ce passage est entierement necessaire; car le nouveau Testament nous parlant de la gloire de Dieu en Iesus-Christ nous parle

d'une gloire que nous contemplons: Or la gloire de Dieu qui resplendit en Iesus-Christ considéré simplement eu esgard à la generation eternelle, est vne gloire, si vous en demeurez là, que nous ne contemplons point; elle est autant cachée aux hommes que la personne du Pere mesme dont elle est la resplendeur; elle habite vne lumiere inaccessible, ainsi qu'en parle l'Escriture: il faut donc que nous passions de Iesus-Christ considéré simplement comme Fils; à luy comme Mediateur; de luy considéré simplement comme Dieu, à luy-mesme considéré comme manifesté en chair: & de fait par cela la gloire du Pere & du Fils qui estoit invisible a esté renduë visible aux hommes: aussi falloit-il que celuy qui estoit la resplendeur du Pere par la generation eternelle fust Mediateur entre Dieu & les hommes, puis que par l'œuvre de la redemption Dieu avoit à communiquer sa gloire & son image aux hommes. Et si delà la création a deu estre faite par le Fils d'autant que la création communiquoit aux creatures l'image de Dieu: à plus forte raison la redemption qui communique l'image de Dieu en vne mesure beaucoup plus grande. Que si vous demandez comment nous voyons cette gloire de

Dieu en Iesus-Christ: Nous ne pouiôs mieux  
satisfaire à vostre demande & vous monstrer  
cette verité que par les propres paroles de S.  
Iean au 3. de sa premiere, *Dieu*, dit-il, *est*  
*charité*, & en cela est manifestée la charité de  
*Dieu envers nous*, que Dieu a enuoyé son  
*Fils unique au monde*, afin que nous vissions  
par luy; En cecy, adjouste-t'il, *est la charité*,  
*non point que nous ayions aimé Dieu*, mais  
*pource que luy nous a aimez* & a enuoyé son  
*Fils pour estre propitiation pour nos pechez*.  
Et par celles de saint Paul, qui en parlant  
de l'Euangile, dit que nous y contemplons  
*comme en un miroir la gloire du Seigneur*. 2.  
Cor. 3. Dieu, mes freres, ne pouuoit estre  
cognu en ses vertus & proprietéz; car luy  
& ses vertus sont vne mesme chose; or, entre  
toutes ses vertus il y en a deux qu'il prefere,  
s'il faut ainsi dire, aux autres, & esquelles il  
constitué le plus sa gloire, à sçauoir sa chari-  
té, & sa saincteté. Quant à la charité, Dieu  
en fait telle estime, que bien qu'il eust ma-  
nifesté ses diuerses vertus en la creation,  
neantmoins il a fait estat d'estre encor in-  
cognu au monde, tandis qu'il n'auoit poin-  
te manifesté aux hommes la charité par laquel-  
le il a exposé son propre Fils à la mort pour  
eux l'ayant reuestu de leur nature: car faire

creature celuy par lequel il auoit créé toutes choses, exposer à opprobre son Fils qui estoit le Dieu de gloire, & liurer à la mort l'auteur de vie & d'immortalité, son vnique & son bien-aimé, & cela pour des miserables creatures, pour des pecheurs, pour des ennemis, & encor pour esleuer ces miserables à vn Paradis celeste à la communion de sa gloire & de soy-mesme, est vne charité qui est infiniment au dessus de la bonté qui apparoissoit par la creation; c'est vne charité si grande que tous les hommes, voire les Anges quand vous leur donneriez tout le temps de leur estre, à conceuoir & mediter, n'en scauroient conceuoir vne si grande; à raison dequoy l'Apostre dit que les choses que Dieu auoit préparées à ceux qui l'aiment, (parlant de l'œuvre de la redemption,) estoient choses qui surpassoient toute conception humaine: & saint Pierre dit que les Anges *desirent de regarder insqu'au fonds de ces choses*, à scauoir comme ne pouans le trouuer.

Quant à la sainteté de Dieu, qui est cette vertu par laquelle Dieu hait le peché, Bien que Dieu l'eust manifesté par la menace de mort faite à l'homme dés qu'il pecheroit, & par l'euenement des punitions; bien aussi qu'il leust monstrée en la loy par les sa-

crifices des bestes qui se faisoient pour le peché ; neantmoins cela monstroit peu la haine de Dieu contre le peché , à comparaïson de la mort du propre Fils de Dieu ; car que Dieu ait plustost puny le peché en son Fils que de le laisser impuny, monstre vne extreme haine du peché ; afin que ie ne parle icy de la puissance & sagesse admirable par laquelle Dieu de la mort & resurrection de Iesus-Christ , fait sourdre des nouvelles creatures, & vne Eglise sainte & sans tache. Ainsi vous voyez comment Dieu a fait resplendir sa gloire en Iesus-Christ ; & c'est à raison de quoy Iesus-Christ disoit lors que Philippe luy eust dit, Seigneur monstre nous le Pere, & il nous suffit ; *Philippe qui m'a veu il a veu mon Pere* ; Et l'Euangile est appellé le miroir où nous contemplons cette face de Dieu , à l'opposite de la mesure de reuelation que Dieu auoit faite en l'ancien Testament, entant qu'en l'ancien Testament il n'y auoit proprement que les ombres & figures du mystere de la redemption. Il y auoit voirement des promesses de grace & de remission de pechez par lesquelles les esleus estoient amenez à salut, Dieu imputant à iustice la foy qu'on auoit en ces promesses ; mais la maniere de l'expiation des pechez , à sçauoir la

mort du Fils de Dieu incarné, sur laquelle ces promesses là estoient fondées par deuers Dieu, estoient couuerte du voile des ombres, & des tenebres des entendemens, iusqu'à ce que le voile ait esté osté par Christ, & qu'il ait donné vne plus grande mesure de son Esprit, comme vous voyez Luc 18. que Iesus-Christ (auant l'accomplissement des choses, & auant qu'il eust donné la grande mesure de son Esprit,) disant aux douze Disciples, *Voicy nous montons en Ierusalem, & seront accõplies touchant le Fils de l'homme toutes les choses qui sont escrites par les Prophetes; c'est qu'il sera liuré aux nations, & apres qu'ils l'auront fouetté ils le mettront à mort: mais au troisieme iour il ressuscitera: Il est adjousté, & ils n'entendirent rien de ces choses, ains ce propos leur estoit caché, & n'entendoient point ce qu'il leur disoit.* La gloire de Dieu doncques estoit en quelque forte en l'ancien testament, à sçauoir es predictions de la venuë du Messie, comme liberateur & souuerain sacrificateur: mais le souuerain Sacrificateur avec ses sacrifices charnels, & les lauemens & aspersions & autres ceremonies, estoient vn voile mis la dessus au trauers duquel la maniere particuliere dont la iustice de Dieu feroit satisfaite,

& laquelle manifeste la gloire & la merueille de la charité de Dieu, ne pouuoit estre apperceuë que tres-difficilement : mais bien iugeoit-on en gros & confusément que les temps du nouueau Testament descouriroiēt quelque chose de grand. C'est poutquoy sainct Paul dit Coloss. 1. touchant l'Euangile que c'est le *secret qui auoit esté caché des tous les siecles & ages*, comme 1. Corinth. 2. *Nous proposons la sapience de Dieu qui estoit en mystere, cachée, que Dieu auoit ia deuant tous les siecles determinee à nostre gloire, laquelle nul des Princes de ce siecle, (c'est à dire, des principaux docteurs d'Israël) n'a cogneë, car s'ils l'eussent cogneue, iamais ils n'eussent crucifié le Seigneur de gloire.* Ainsi le temps du nouueau Testament auquel Iesus-Christ s'est offert à Dieu en la Croix, est le temps de la resplendeur de la gloire de Dieu, & comme vn midy au prix de la nuict & obscurité de l'ancien Testament, pendant laquelle il n'y auoit que comme quelques estoiles luisantes au firmament, dont aussi Zacharie dit que l'Orient d'enhaut nous a visité.

Mais considerons encor, mes freres, que Iesus-Christ non seulement nous fait voir la gloire, mais qu'il nous transforme en

sa semblance, de telle sorte que chaque fidele deuenit par quelque proportion la resplendeur de la gloire de Dieu, & reçoit la marque de sa nature diuine: Ce que Iesus-Christ a comme Mediateur, il l'a pour le communiquer aux fideles & au corps dont il est le chef: aussi, dit-il, Jean 17. touchant ses Disciples, *Pere, ie leur ay donné la gloire que tu m'as donnée: & saint Paul dit, 2. Corinth. 3. que nous sommes transformez en l'image de Dieu de gloire en gloire.* Mais pour entendre cela, reuenons à la comparaison de nostre Apostre touchant le Soleil & la resplendeur qui en prouiet: La premiere resplendeur du Soleil consiste es rayons qui sortent du Soleil & sont de mesme nature & substâce que le Soleil; mais apres, ces rayons produisent encor vne resplendeur en l'air, & es corps d'icy bas; sur tout s'ils rencontrent quelque corps net & poly comme vn miroir, là se forme vne petite image du Soleil qui n'est pas de mesme nature que le Soleil & ses rayons, mais en est l'effect & la ressemblance. De mesme Dieu a sa resplendeur naturelle qui est son Fils, & ce Fils par son office de Mediateur porte sa resplendeur & ses rayons dans les ames des fideles, & y produit vne resplendeur qui est l'image & la

semblance de soy & de son Pere, comme dit l'Apostre Coloss. 3. *que le nouvel homme dont nous sommes reuestus en Christ se renouvelle en cognoissance selon l'image de celuy qui l'a creé,* & Ephes. 4. que ce nouvel homme est creé selon Dieu en iustice & vraye sainteté: & saint Pierre au premier de sa seconde dit que nous sommes rendus participans de la nature diuine: & c'est cette resplendeur qui vous est monstrée quand l'Escriture appelle les fideles lumiere & enfans de lumiere, & les oppose aux enfans de ce siecle comme a des enfans de tenebres: car qu'est-ce à dire cela, sinon que Iesus-Christ produict en nous vne resplendeur de sa lumiere? Vous estiez iadis tenebres, mais maintenant vous estes lumiere au Seigneur, cheminez donc comme enfans de lumiere: & saint Iean si nous cheminons en lumiere comme Dieu est en lumiere, nous auons communion auéc luy, & le sang de son Fils Iesus-Christ nous purge de tout peché. Et comme la resplendeur de Iesus-Christ est appelée resplendeur de gloire, l'Apostre saint Paul dit Ephes. 5. que Iesus Christ s'est donné pour l'Eglise afin qu'il l'a sanctifiast & se la rendist vne Eglise glorieuse n'ayant ny ride ny autre telle tache. Vien, fidele, mediter cette gloire & cette

condition, afin que tu rejettes les œuvres infructueuses de tenebres, & sçaches que comme Dieu a constitué sa gloire & sa splendeur en charité & sainteté, aussi tu seras par sainteté & charité la resplendeur de la gloire de Dieu. Et c'est à quoy auoit esgard S. Iean lors qu'apres auoir dit, Dieu est charité, il adiouste, si nous nous aimōs l'un l'autre Dieu demeure en nous, & la charité est accomplie en nous.

Mais allons encor plus auant, mes freres, & considerons en la montagne de Thabor, là où Iesus-Christ fust transfiguré, & où sa face resplendit comme le Soleil & ses yestemens deuiendrent blancs comme la lumiere, la resplendeur qu'il nous communiquera en nos corps au iour de la resurrection glorieuse: puis qu'il est dit que Iesus-Christ transformera nostre corps vil pour le rendre conforme à son corps glorieux. Alors les fideles seront comme autant de Soleils qui de la terre serōt esleuez dās le Ciel pour y resplēdir à iamais, selon que dit Iesus-Christ au 13. de S. Matth. que les iustes reluiront comme le Soleil au Royaume de leur Pere. Et par cela vous voyez iusqu'ou s'estend l'efficace de la resplendeur qu'à Iesus-Christ comme nostre chef & nostre Mediateur.

Cette mesme efficace peut estre considerée en l'autre tiltre par lequel l'Apostre appelle Iesus-Christ la marque engrauée de la personne du Pere : Car comme Iesus-Christ est la premiere & essentielle marque du Pere, ceux qui viennent à luy reçoivent son impression, & obtiennent par l'efficace de l'Esprit de Christ le caractere & l'image du Pere. C'est ce que l'Escriture nous enseigne formellement, quand elle dit que Dieu nous a scellez en Iesus-Christ : comme 2. Cor. 1. *celuy qui nous conferme avec vous en Christ c'est Dieu, lequel aussi nous a scellez & donné les arrhes de l'Esprit en nos cœurs; & Eph. 1. Ayans creu vous avez esté scellez du saint Esprit de la promesse* : Or le seau imprime son image & sa marque en ce à quoy il est appliqué : Si donc le saint Esprit, qui est vray Dieu avec le Pere & le Fils, est ce seau, il imprime en nous l'image de Dieu.

C'est là le vray caractere du fidele, & non ce que s'imaginent ceux de l'Eglise Romaine qui parlent d'un caractere indelebile lequel ils tiennent estre formé en l'ame par la participation exterieure & corporelle des sacremens, & cela autant és meschans qu'és bons. Nostre caractere n'est que l'image de Dieu imprimée par le saint Esprit és seuls

fideles. Et maintenant nos ames n'ont cete image qu'en partie, la chair & le peché y laissant encor leurs traits que l'Esprit de Dieu va peu à peu effaçant; mais viendra le temps auquel l'impression de l'image de Christ sera en sa perfection, car nous serons semblables à Dieu quand nous le verrons ainsi comme il est. O fideles qui soupirez pour les deffauts de vostre sanctification, prenez courage en cette esperance, & cependant reconnoissez combien vous estes obligez à effacer en vous les traits de Sathan & du monde, afin que vous soyez la marque engrauee de Dieu: ne vous conformez donc point à ce present siecle, mais soyez transformez par le renouvellement de vostre entendement pour esprouer quelle est la volonté de Dieu bonne, plaisante & parfaite: vous ne pouuez estre discernz d'entre ceux que Dieu expose à Sathan l'executeur de son ire, que par cette marque, l'Ange destructeur ira frappant tous ceux qui n'ont cette marque du sang de l'Agneau: afin que nous renoncions aux caracteres du monde, l'ambition, la vanité, l'avarice, la souillure, le mensonge, & prenions le caractere de Dieu & de son Esprit, qui sont les vertus chrestiennes. Et çachez que cette marque doit estre vne

marque engrauee, non vne marque peinte; car ce n'est pas assez que tu ayes quelque apparence de pieté & la profession extérieure, il faut que l'image de Dieu ait ses traits au dedans de ton ame, au profond de ton cœur:

Et ce caractere de Christ imprimé de la sorte en nos ames s'estendra finalement iusqu'à nos corps, sçauoir au iour de la resurrection, selon qu'il nous est enseigné, que comme nous auons porté icy bas l'image du premier Adam en mortalité, infirmité, corruption & misere, nous porterons l'image de Iesus-Christ nostre second Adam en incorruption, immortalité & gloire. Et voila comment ces grands aduantages que Iesus-Christ a tant que Mediateur d'estre la resplendeur de la gloire du Pere & la marque engrauee de la personne sont communiquez aux fideles.

Maintenant pour la fin recueillons - en quelques obseruations pour nostre instruction & consolation: Premierement d'icy resulte la verité & l'vnité de nostre Mediateur; La verité, car s'il est la resplendeur de la gloire du Pere & la marque engrauee de sa personne, c'est luy qui peut nous restituer l'image & la gloire de Dieu que nous auons perduë par

le peché, comme il est dit Rom. 3. *que tous ont peché & sont entierement destituez de la gloire de Dieu.* Venez donc ô pauvres pecheurs qui estes assis en tenebres & en ombre de mort, voicy vostre lumiere, la lumiere de vie, voire la resplendeur de Dieu mesmes, & partant la source de lumiere & de vie és creatures : ie suis, vous dit-il, la racine & posterité de Daud, l'estoile resplendissante & matiniere. Venez pecheurs des tenebres espaises du peché à cette yraye lumiere, sortez de la puissance des tenebres pour entrer par Iesus-Christ au Royaume des Saincts en lumiere. Ames affligées qui estes dans les tenebres des calamitez, venez à cette lumiere resiouyissante qui de ses rayons dissipera vos tenebres & vos maux : *L'Eternel*, disoit Daud, *est ma lumiere & ma deliurance, de qui auray-ie peur ? L'a-t'on regardé, dit-il, on en est tout esclairé, & leurs faces ne sont point confuses.* Si donc vous dites, qui nous fera voir des biens ? Daud vous respond au Pl. 4. & vous enseigne d'où ils vous viendront disant, *Plusieurs disent, qui nous fera voir des biens ? leue sur nous la clarté de ta face ô Eternel.*

Pl. 27.

Pl. 34.

L'vnité, car luy seul est la resplendeur

essentielle de la gloire du Pere : donques luy seul nous peut communiquer la gloire & l'image du Pere : car comme il n'y a que les rayons du Soleil qui puissent communiquer aux corps d'icy bas la splendeur du Soleil, aussi il n'y a que le Fils de Dieu qui puisse communiquer aux hommes la lumiere de la paix & de la grace de Dieu : & est remarquable ce que dit saint Iean au chapitre 1. touchant Iean Baptiste, *Cettuy - cy vint pour porter tesmoignage de la lumiere, afin que tous creussent par luy : luy n'estoit pas la lumiere, mais estoit enuoyé pour tesmoigner de la lumiere.* Tout ce qu'ont peu faire les saints a esté de donner tesmoignage à la lumiere, comme Iean Baptiste : mais Iesus-Christ seul est la lumiere qui expie le peché : c'est pourquoy il est appellé Soleil de Iustice par Malachie, & Orient d'enhaut, lequel est vnique, afin que nous sçachions qu'il n'a non plus de compagnons en la charge de Mediateur, que le Soleil en l'vniuers. *Christ est-il diuisé. Paul a-il esté crucifié pour vous?* dit saint Paul 1. Cor. 1. Et pourquoy ioindre à Iesus-Christ les Saints pour expier par leurs souffrances la peine temporelle des pechez, veu que Iesus-Christ par la lumiere parfaite de sa satisfaction en la croix a dissipé tout à fait

les tenebres de l'ire de Dieu & de la condamnation; qu'il a (côme dit l'Apostre Coloss. 2) effacé l'obligation qui estoit contre nous, l'ayant entièrement abolie & ficee en la croix?

2. Quand il nous est parlé de Iesus-Christ entant que resplendeur de la gloire du Pere, regardons où c'est que nous auons à chercher cette lumiere: certes c'est en l'Euangile, en la parole de Dieu; c'est là où l'Apostre dit 2. Cor. 4. que resplendit la lumiere de la gloire de Christ; & Dauid dit de la parole de Dieu, *Seigneur ta parole sert de lampe à mon pied & de lumiere en mon sentier*: la loy de l'Eternel donne sapience au simple & illumine les yeux: l'Escriture red sage à salut: afin qu'icy, fideles, vous vous esiouyssiez d'estre sortis des tenebres des traditions humaines, pour suivre cette lumiere de vie. Que si on nous obiecte que l'Euangile est couuert & obscur, Nous auons la response de l'Apostre à sçauoir que si l'Euangile est couuert il est couuert à ceux qui perissent auxquels le Dieu de ce siecle a auégulé les entendemens: Et remarquez ces mots, *Dieu de ce siecle*, car c'est pour exprimer que Sathan auégule les hommes par les interests de ce siecle, les biens & commoditez de la vie, le repos de la chair, les voluptez. Du cœur plein de conuoitises

mondaines, montée à l'esprit des fumées qui  
l'aveuglent, selon que l'Apostre Ephes 4, dit  
que les entendemens des hommes sont ob-  
scurez de tenebres par l'endurcissement du  
cœur. Voulez-vous donc, fideles, persister  
en la lumiere & ne point perdre Iesus-Christ  
la resplendeur de la gloire du Pere, purifiez  
vos cœurs & renoncez aux œuvres infra-  
ctueuses de tenebres; car si les pauvres Gen- Rom.  
tils pour avoir detenu en iniustice la lumie-  
re de la nature qui resplendissoit par les œu-  
res la creation, ont esté destitués d'intelli-  
gence & remplis de tenebres, de sorte qu'ils  
ont changé la gloire de Dieu incorruptible  
en la semblance & image de l'homme cor-  
ruptible; quel sera le iugement de Dieu sur  
ceux qui ont detenu en iniustice vne lumiere  
beaucoup plus excellente, à sçavoir la res-  
plendeur de la gloire de Dieu par l'Euangile?  
seront-ils pas abandonnez de Dieu aux  
superstitions qui regnent en la terre & qui  
changent encor la gloire de Dieu incor-  
ruptible en la semblance de l'homme cor-  
ruptible? Et ce que nous disons de chaque  
particulier, nous le disons par proportion du  
gros de l'Eglise, c'est que si nous ne nous a-  
mandons, Dieu nous otera la lumiere de la  
predication de l'Euangile, selon le iugement

dont il menaçoit l'Eglise d'Ephese au 2. de l'Apocal. *Je viendray à spy bien-tost & osteray son chandelier de son lieu si tu ne te repens.* Et certes, mes freres, d'où viennent les tenebres de diuers maux, sinon de ce que nous auons abusé de la lumiere de l'Euangile, & que pendant qu'elle resplendissoit nous nous sommes addonnez aux œuures infructueuses de tenebres?

Venons donc, mes freres, venons à la repentance, car c'est elle qui rallume la lumiere en nos ames, & ouure les cœurs à la resplendeur de la gloire de Dieu: Sçachez vous qui vous desplaidez de vos offenses, & presentez à Dieu le sacrifice d'un cœur froissé & brisé, que le Soleil de iustice vous communiquera les rayons de sa grace: que Iesus-Christ la resplendeur du Pere fera resplendir en vos ames la consolation: au milieu des tenebres de maux l'Esprit de Dieu & de gloire reposera sur vous.

Et icy se presente vne consolation euidente, à laquelle auoit esgard l'Apostre en cette Epistre, car il escriuoit aux Hebreux affligez, comme s'il leur eust dit, vous voyez des tenebres de maux & de miseres que la haine du monde espaisit contre vous, mais courage, puis que voicy Iesus-Christ la resplendeur de

la gloire du Pere qui se communique à vous. Vous estes exposez à ignominie & opprobre, mais voycy la vraye gloire, voire la gloire du Pere qui vous est presenté en Iesus-Christ par l'Euangile: n y a-t'il pas donc dequoy mespriser les efforts & les menaces du monde? C'est aussi, mes freres, la consolation que vous prendrez, si ce n'est que vous aimassiez mieux la gloire & splendeur des hōmes que la gloire de Dieu: & que vous ne sceussiez recognoistre combien il vaut mieux souffrir icy bas quelques tenebres de la haine du monde, que d'estre iettez pour iamais est tenebres de dehors là où il y aura pleur & grincement de dents.

Aussi nous apprenons icy à rejeter la vanité & somptuosité des vestemens, & à n'estre point tentez par la splendeur des richesses & dignitez: pourquoy, fideles, dōt toute la gloire doit estre diuine & spirituelle, consistante en l'incorruption de l'esprit qui est de grand deuant Dieu, constitués-vous vostre gloire en la parure de dehors & en l'ornement du corps? veu que toute sa gloire, fust elle egale à celle de Salomon, ne peut atteinre à celle des Iys, au lieu que la gloire de vos ames en vertus chrestiennes, est vne resplendeur de la gloire de Dieu. Et comme vous auez entendu que

la gloire de Dieu manifestée en Iesus-Christ  
consiste en charité, obtenōs, mes freres, cette  
gloire: qu'il ne soit pas dit que contemplant  
la charité ineffable de Dieu enuers nous, nous  
soyions sans charité enuers nos prochains;  
Soyons, soyons ainsi transformez en l'image  
de la charité & sainteté de Dieu, afin que  
nous soyions aussi transformez en sa gloire  
& felicité celeste; car comme l'Apostre a eu  
pour but en ce texte de monstrier que Iesus-  
Christ a esté conuenablement fait la resplen-  
deur de la gloire du Pere par son exaltation;  
d'autant qu'auparauant Iesus-Christ & par sa  
nature diuine & par son office auoit esté la res-  
plendeur de la gloire de Dieu icy bas, aussi il  
est certain par proportiō, que si nous sommes  
icy bas par nostre vie la resplendeur de la  
gloire de Dieu, nostre lumiere & nos bonnes  
œuvres luisans deuant les hommes, Dieu aus-  
si nous fera resplendir en gloire là haut en  
son Paradis. Ainsi soit-il.